

IV. PAZKO IGANDEA (A)

Otoitza

Jainko ahalguztidun betierekoa,
 eraman gaitzazu zeruko atseginen jabe izatera,
 fededunen artalde apala irits dadin,
 beronen artzaina den Kristo iritsi den lekuraino.
 Zurekin eta Espiritu Santuarekin.

I. IRAKURGAIA: Ap Eg 2, 14a 36-41

Jaungoikoak Jaun eta Kristo egin du.

Apostoluen Eginetatik

Pentekoste-egunean, Pedrok, hamaika apostoluen artean zutik, ahotsa indartuz, honela hitzegin zuen: «Israel etxe guztiak jakin beza ziur, zuek gurutziltzatu zenuten Jesus hau, Jaungoikoak Jaun eta Kristo egin duela».

Hitz hauek bihotza ukitu zieten, eta honela esan zieten Pedrori eta beste apostoluei: «Senideok, zer egin behar dugu?»

Pedrok erantzun: «Bihotz-berri zaitezte eta bataiatu guztiok Jesu Kristoren izenean, zuen bekatuen barkamenerako, eta Espiritu Santua hartuko duzue. Izan ere, zuentzat da agintzaria, eta zuen seme-alabentzat, eta Jaunak, gure Jaungoikoak, deitu ditzakeen guztientzat, urrutikoak badira ere».

Hitz hauekin eta beste hitz askorekin behartzen zituen eta arrenka eskatzen zien, esanez: «Salba itzazue zeuen buruak gizaldi galdu honengandik».

Haren hitza onartu zutenak bataiatu egin ziren. Eta egun hartan hiruren bat mila lagun bildu zitzaizkien.

ERANTZUN SALMOA: Sal 22, 1-3. 4. 5. 6

**R/. Jauna dut artzain,
 ez naiz ezeren beharrear.**

Edota: Aleluia.

Jauna dut artzain, ez naiz ezeren beharrear:

larre gurietan etzanarazten nau.

Atsedenezko iturrira narama

eta birbizten dit barrena.

Banarama bidezidor zuzenetatik

bere izenagatik. R/.

Ibar ilunetan banabil ere, ez nago gaitz-beldur,

Zu nirekin baitzaude:

zure zigorra eta makila,

hauek dira nire poza. R/.

Atontzen didazu mahaia,
etsaiak dauzkadala begira;
olioz gantzutzen didazu burua,
gainezka dago nire edontzia. R/.

Zoriona eta grazia ditut aldean,
neure bizi guztiko egunetan;
eta Jaunaren etxean naiz biziko
luzaroen luzaro. R/.

II. IRAKURGAIA: 1 Pe 2, 20b-25

Zuen artzain eta gotzainarengana bihurtu zarete.

San Pedro Apostoluaren epistolatik

Senide maiteok: On egiteagatik, nekeak jasaten badituzue eramanpenez, gauza ederra egiten duzue Jaungoikoaren begietan. Horretara deituak izan baitzarete. Izan ere, Kristok berak ere nekeak jasan zituen zuengatik, bere urratsei jarraitzeko eredu zuei utzirik: ez zuen egin bekaturik, ez zuten aurkitu Haren ahotan gezurrik. Gaizkiesaka zerabiltenean, ez zien gaizki esanez erantzuten; ez zien zemairik egiten nekaldian, bere burua utzirik epaile zuzenaren eskutan. Gure bekatuak bere bizkarrean habe gainera zituen eraman, gu bekaturako hilik, santutasunerako bizi gaitzen; Haren zauriek sendatu gaituzte. Ardi galduak bezala zenbiltzaten; baina orain zuen artzain eta gotzainarengana bihurtu zarete.

EBANJELIOA: Jn 10, 1-10

Alleluia: Jn 10, 14

R/. Aleluia.

V/. Ni naiz artzain ona –dio Jaunak–;
ezagutzen ditut neure ardiak,
eta neureek ezagutzen naute Ni. R/.

Ni naiz ardien atea.

Jesu Kristoren Ebanjelioa San Joanen liburutik

Aldi hartan, Jesusek honela esan zien farisearrei: «Egi-egiaz diotsuet: artegira, atetik sartu beharrean, beste nonbaitetik sartzen dena, lapurra da eta harrapatzailea. Atetik sartzen dena da ardien artzaina. Honi ireki egiten dio atezainak, eta ardiek aditzen dute haren ahotsa; bakoitzari bere izenez deitzen dio, eta kanpora ateratzen ditu. Bere ardi guztiak atera ondoren, haien aurretik joaten da eta ardiek jarraitu egiten diote, ezagutzen baitute haren ahotsa. Arrotzari, ordea, ez diote jarraituko; ihes egingo diote, arrotzen deia ez baitute ezagutzen».

Jesusek parabola hau esan zien, baina haiek ez zioten antzeman zer esan nahi zien. Beraz, berriro honela esan zien Jesusek: «Egi-egiaz diotsuet; Ni naiz ardien atea. Lehen etorri ziren guztiak lapurrak ziren eta harrapatzaileak; eta ardiek ez zieten entzun. Ni naiz atea. Niregandik sartzen dena, salbatuko da; sartuko da eta aterako, eta aurkituko du jatekoa. Lapurra ez dator, ostu, hil

eta hondatzera baizik; Ni, berriz, bizia izan dezaten eta ugari izan dezaten etorria naiz».

Oparigaien gainekoa

Pazko sakramentu honek, Jauna, gure erospena berritzen du;
hartzazu gure esker ona, eta iguzu,
opari hau beti poz iturri izan dakigula.
Jesu Kristo.

Prefazioa: Pazkoaldikoa.

Jaunartze ondorengoa

Artzain ona zaren Jainko Jauna,
zaindu ezazu maitasunez zeure artaldea;
eta eraman betiko larre gurietara
zeure Semearen odolaz salbatu dituzun ardiak.
Errege bizi baita.